

*A dì 18.* In pregadi, fo posto do decime ai governadori, *videlicet* perse, per l'anno presente, *videlicet* numero 70 et 71; e questo per il gran bisogno si havea di recuperar danari, per proveder a le occorrentie di la terra, sì da mar, come per i movimenti di Maximian.

*Item*, fo electo capetanio al colfo sier Marco Antonio Contarini, *quondam* sier Alvise, da Santo Agustin, fo sopracomito. Et rimase, per aversi ben portato in armada; et il zeneral scrisse gran ben di lui.

*A dì 12 ditto.* Fo publicato nel mazor conseio, esser stà nel conseio di X banditi, absenti, ma chiamadi, sier . . . Contarini, di sier Zuane, da San Stai, e sier Andrea Soranzo, *quondam* sier . . . , quali erano compagni di sier Etor Barbarigo, confinato in la prexon Forte; *videlicet* che 'l Contarini sia confinà in Candia, et il Soranzo a Chersso; et non obedendo di andar a' lhorò confini, siano in bando 110 di terre e luogi, con taia, chi li amazerà habbi lire 1500, e chi li darano vivi in le forze lire 3 milia di so' beni, e, non havendo, di danari di la Signoria nostra; et questi poi siano conduti qui et apichadi. Et questo fo per li soi mes'ati, fevano molti inconvenienti, *adeo* che non si poteva viver con loro.

*A dì 20 fevrer.* Fo posto parte, per i consieri, a gran conseio, et *etiam* fo in opinion li cai di 40, atento il conseio di X era di summa importantia, et, *licet* fusseno stà eleti li ordenarij, ne manchavano perhò do; per tanto messeno parte, di elezer quelli dil conseio di X, sì ordenarij come li extraordinarij, per scurtinio dil conseio di pregadi, et 4 man di eletion. Ave la parte, 6 non sinceri, di la parte 662, di no 801; e fu preso di no; et fono electi, *juxta solitum*, per 4 man di eletione. Et rimaseno do nuovi ozi, sier Stefano Contarini, fo podestà a Bergamo, *quondam* sier Bernardo, et sier Bernardo Barbarigo, fo savio a terra ferma, *quondam* el serenissimo principe; e fo ben preso.

*Item*, fu decreto, per parte presa, *ut supra*, che Stefano Barbarigo, fo fiol natural di sier Andrea, fo dil serenissimo, el qual za anni 3 è bolador, con el qual officio sustenta si e la fameia fo dil padre, perhò fo confirmado in ditto officio, come se 'l fusse stà balotado in coleio, justa la parte in la coretion presa. Ave 997, 335 di no, et 5 non sinceri.

*A dì 24 ditto.* Nel mazor conseio fo electo provedador in armada, sier Hironimo Contarini, fo capetanio di le galie di Barbaria, *quondam* sier Francesco, ditto Grilo, qual vene dopio, e romase da sier Tomà Duodo, è patron l'arsenal; et acceptoe *libentissime*.

*A dì 23.* Si ave da Roma, el pontifice esser partito et andato per mar a Piombino, aquistato per suo fiol, ducha Valentino, novamente, per veder quella terra, *licet* fusse, ditto era fuzito di Roma, per non aspetar li re dieno venir in Italia, dubitando esser deposto dil papado.

In questo tempo, in Franza el cardinal Ascanio fo relasado dal re, e rendutoli i soi benefiej; et era in gratia dil re. Et il re Fedrico have il stato promesso in Franza, con intrada di franchi 40 milia, e, tra Franza e Spagna, provision di franchi 60 milia; e lui renencia ogni raxon ha nel regno, et fa render Taranto a' spagnoli. Nel qual tuta via è dentro suo fiol, ducha di Calabria, con zente; e vi mandò domino Zuan Batista Spinelli, fo orator in questa terra, a Taranto, a far tal consignatione a' spagnoli. Et in questo mexe el re di Franza diceva, voler far armata in Franza e a Zenoa in ajuto di la Signoria nostra contra turchi, cussi persuaso da sier Domenego Trivixan, el cavalier, e sier Hironimo Donado, dotor, oratori nostri, che lo persuadeva assai.

In questi giorni a Verona fo armato una altra galia, soracomito Alvise da Castion, dito el Frate, et fece la mostra, come ho scripto di sopra, a Verona; e li homeni di capo dati a Venecia. *Etiam* pocho da poi armò una altra Baldisera da Lestagna, et fece la mostra, *ut supra*; et a Venecia vene le zurme ben in hordine *etc.*

A la fin di questo mexe, a dì 17, la duchessa di 110 Urbini, madona Ixabella, e la marchexana di Mantova, e madona Emilia, fo moier dil conte Antonio, fradelo dil ducha di Urbini, e la marchesana di Cotrone, che stàva a Mantova, andono a piacer per Po a Venecia, con il prothonotario, fradelo dil marchexe di Mantova; et veneno incognite. Et Francesco Trivixan, fa li fati dil marchexe, li preparò la caxa di sier Nicolò Trivixan, procurator, a San Stai, e ivi arivonò. La Signoria mandò a visitarle li savij ai ordeni, oferendosi; e foli fato uno presente di confetion e cere, per valuta di ducati 25. Andavano per la terra stropate, veteno il tutto e poi si partino. Et dil mexe di marzo partino per terra, veneno a Verona el mercore santo, alozò in caxa dil conte Bacharin di Canosa; et sier Zorzi Corner, el cavalier, capetanio, volse presentarli, per nome di la Signoria, certi pessi; e poi la zuoba sancta si partino et andono a Mantova, auto gran piacer.

In questi zorni vene in questa terra tre citadini veronesi, domino Justo di Justi, dotor et cavalier, domino Zen Novelo, so fradelo, et suo cuxin, domino Agustin, et fonno a coleio, exponendo, che fonno